



KOICA
Korea International
Cooperation Agency



MATADALAN GOVERNASAUN KLIMÁTIKA



**Matadalan Amigavel ba Foin-sa'e
sira iha Timor-Leste atu komprende
oinsá desizaun klimátika sira halo
no oinsá foin-sa'e sira bele forma
desizaun sira-ne'e**

Rekoñesimentu

Matadalan Governasaun Klimátika

Ami rekoñese apoiu hosi Ministériu Juventude, Desportu, Arte, no Kultura, no Ministériu Turizmu no Ambiente ba sira-nia koordinasaun no orientasaun.

Ho kontribuisaun hosi:

Adolexente no foin-sa'e sira hosi grupu oin-oin hanesan estudante, lider foin-sa'e, grupu ambiente, labarik-feto no foin-sa'e feto sira, ema ho defisiénsia, no LGBTQI+ hosi munisípiu Dili, Viqueque, no Lautém, ne'ebé partisipa iha konsultasaun no teste iha kampu, no fahe sira nia esperiénsia, perspetiva, no hanoin sira durante dezvoltamentu ba matadalan ida-ne'e.

Hirak-ne'e inklui Amigo de Jesus, São Pedro, Sagrado Coração de Jesus, CAFÉ, An-Nur, Colegio São João Paulo II, KAY-RALA, Colegio Santo Inácio de Loyola, ESTV – ETI, UNTL, DIT, UCT, ESG CALIXA, Cristal, ICS, ESGP 4 de ESG CALIXA, Cristal, ICS, ESGP 4 de Setembro, ESG Lere, ESG Konis, ESG CAFÉ, Vocational no.1, Laudato Si' Movement de Timor-Leste, Alumni LCOY Timor-Leste, APFTL, SOA-TL, RYLA-TL, KHS, AJAR, UC-TL, BERNABAD, SBHMDU.

Sira nia kontribuisaun signifikativu tebes hodi ajuda forma konteúdu, linguajen, no instrumentu hodi asegura katak dokumentu ne'e relevante, inkluzivu, apropriadu kulturalmente, no amigavel ba foin-sa'e sira.

Deklarasaun:

Matadalan ida-ne'e nu'udar rekursu edukasionál ne'ebé ho intensaun atu apoia aprendizajen no envolvimentu foin-sa'e sira iha asaun klimátika. Ida-ne'e simplifika mudansa klimátika, advokasia, no konseitu polítika ba objetivu edukasionál nian no la troka polítika ofisiál governu ka dokumentu sira hosi Konvensaun Enkuadramentu Nasoins Unidas ba Mudansa klimátika (UNFCCC)..

Série Módulu no Instrumentu Mudansa Klimátika Amigável ba foin-sa'e sira ne'e hetan finansiamentu hosi Korea International Cooperation Agency (KOICA).

Oinsá atu uza rekursu ida-ne'e?

Série Módulu no Instrumentu Mudansa Klimátika Amigável ba foin-sa'e hanesan rekursu sira ne'ebé dezenvolve atu hakbiit ka empodera adolexente no foin-sa'e sira iha Timor-Leste, liuliu ba sira ne'ebé ho idade 15 to'o 28, liuhosi fornese rekursu aprendizajen kona-ba mudansa klimátika, permite asaun klimátika ne'ebé informadu, inkluzivu, no tuir kontestu lokál.

Rekursu sira-ne'e maka:

- | | | | |
|---|---|---|--------------------------------|
|  1 | Módulu Mudansa Klimátika |  6 | Instrumentu Testu Fotografia |
|  2 | Matadalan Asaun Klimátika |  7 | Instrumentu Glosáriu Klimátika |
|  3 | Instrumentu ba Asaun Klimátika | | |
|  4 | Matadalan Akordu Internasionál Klimátika | | |
|  5 | Matadalan Governasaun Klimátika  | | |

Matadalan Governasaun Klimátika ida-ne'e maka rekursu **dalimak** hosi Série Módulu no Instrumentu sira Mudansa Klimátika ne'ebé Amigavel ba Foin-sa'e sira. Ami rekomenda atu hahú ho **Módulu Mudansa Klimátika, Matadalan Asaun Klimátika ba Foin-sa'e sira, Instrumentu Asaun Klimátika no Matadalan Akordu Internasionál sira** kona-ba Klimátika hodi harii fundasaun ida ne'ebé metin molok mergulha iha matadalan ida-ne'e. Maibé ita-boot mós bele tama kedas se ita-boot iha interesse atu aprende kona-ba Matadalan Governasaun Klimátika. Rekursu ida-ne'e disponivel iha lian rua: **Inglés no Tetun**. Versaun rua ne'e ho intensaun atu asegura asesibilidade no komprensaun ba ema hotu.

Oinsá atu uza matadalan ida-ne'e:

Oinsá atu uza matadalan ida-ne'e: Ita-boot bele esplora tuir ita-boot nia maneira rasik. Rekursu ida-nee bele uza ba individu, grupu foin-sa'e sira, fasilitadór sira, nst. Ita bele lee mesak, ho kolega sira, ka iha grupu. Karik lee maka susar, koko atu diskute sesaun sira ho lian maka'as, dezeña, jogu papél/role-play, ka konta istória. Asaun hotu-hotu, boot ka ki'ik, halo diferença!

Tabela Konteúdu



SEKSAUN 1 — GOVERNASAUN KLIMATIKA BÁZIKA



SEKSAUN 2 — GOVERNASAUN KLIMÁTIKA IHA TIMOR-LESTE



**SEKSAUN 3 — GOVERNASAUN KLIMÁTIKA INTERNASIONÁL: OINSA MUNDU
DESIDE KONA-BA ASAUN KLIMÁTIKA**



SEKSAUN 1 – GOVERNASAUN KLIMÁTIKA BÁZIKA

Komprende Koba-ba Governasaun Klimátika

Governasaun klimátika maka bazikamente oinsá mundu organiza nia-an atu hasoru mudansa klimátika

Tanbasá maka ita presiza ekipa-serbisu?

Tanba mudansa klimátika la preokupa ho fronteira sira. Inundasaun, bailoro naruk, no nivel tasi-sa'e ne'ebé afeta ema hotu, tanba ne'e laiha aldeia/Suku, sidade ka nasaun ida mak bele rezolve ida-ne'e mesak. Nasaun sira presiza koopera hodi hamenus emisaun, apoio teknolojia no fundu, no apoia comunidade sira ne'ebé vulneravel liu.

Governasaun klimátika la'ós de'it ba polítiku-na'in ka peritu sira, ida-ne'e maka espasu ida katak ba ita-boot nia lian, ideia sira, no asaun sira ne'e importante duni.

Oinsá maka Governasaun Klimátika Funsiona?

-  Halo **polítika no lei** atu hamenus emisaun;
-  Kria **planu no estratéjia** sira atu proteje ema hosi inundasaun, rai-maran/bailoro naruk no anin-boot;
-  Harii **parseria** entre comunidade, governu, no organizesaun globál sira hodi fahe koñesimentu no prátika di'ak liu;
-  Garante katak **lian hotu-hotu bele rona**, inklui mos **foin-sa'e sira**.

Governasaun klimátika ne'ebé di'ak akontese iha nivel tolu ne'ebé ligadu / liga ba malu:



Lokál – Suku no comunidade sira halo asaun (hanesan kuda ai-parapa)

Nasionál – Governu sira transforma nesesidade lokál sira ba planu no orsamentu nasional



Globál – Nasaun sira konkorda kona-ba objetivu sira ne'ebé hanesan liuhosi akordu internasional sira kona-ba klimátika

Hanoin ida-ne'e hanesan kadeia-reasaun ida: Asaun lokál → Polítika nasional → Kompromisu globál

Bainhira parte ida fraku, kadeia/korrente tomak hetan susar. Bainhira parte hotu-hotu serbisu hamutuk, mudansa loloos mosu.



Bainhira ita-boot hatene kona-ba governasaun klimátika, ita-boot bele:

- Haree oinsá asaun ki'ik sira liga ba desizaun boot sira;
- Ko'alia no influensia polítika sira ne'ebé afeta sira nia futuru;
- Asegura katak planu klimátiku sira la'ós de'it liafuan iha surat-tahan, maibé asaun loloos iha terrenu.

Faktu Interessante:

Desizaun klima globál barak ohin loron hahú tanba foin-sa'e sira ezije atu rona sira.



Ezemplu:

Ita-boot haree ona ka hola parte iha atividade kuda ai-parapa?

Ai-parapa sira maka Solusaun Baze-Natureza (NBS) ida ne'ebé forte liu. Sira ajuda proteje tasi-ibun sira hosi erozaun no anin-boot sira, fornese abitante/fatin seguru ba ikan no moris tasi nian sira seluk, no apoia meiusubsisténsia lokál sira.

Bainhira foin-sa'e sira kuda ai-parapa, sira la'ós de'it ajuda sira-nia Suku, sira mós kontribui ba Timor-Leste nia Planu Adaptasaun Nasionál (NAP) no ba kompromisu internasionál kona-ba klima iha UNFCCC nia okos.

Asaun lokál ki'ik sira hanesan ida-ne'e liga diretamente ba objetivu klimátiku globál boot sira.

Solusaun bazeia ba natureza (NbS) mak uza natureza, hanesan ai-laran, mangrove no rai-been, atu ajuda hamenus dezafiu hanesan mudansa klimátika, falta bee, no dezastre, ao mesmu tempu fó benefísiu ba ema no biodiversidade.



Reflesaun:

Mudansa saida maka ita-boot nota ona iha área sira ne'ebé iha ai-parapa kompara ho fatin sira ne'ebé laiha ai-parapa?



LSM-TL media Image

Saida maka Governasaun Klimátika Multinivel?



Ita-boot rona ona kona-ba Governasaun Multinivel?

Multinivel signifika katak akontesementu ka serbisu iha nivel ida ka liu iha tempu hanesan. Bainhira buat ruma iha multinivel, ida-ne'e envolve etapa asaun oioin, foti desizaun, ka influénsia, hanesan:



Governasaun klimátika multinivel maka prosesu ida ne'ebé la'o hela, grupu oioin barak serbisu hamutuk hodi hasoru mudansa klimátika. Ida-ne'e inklui komunidade lokál, governu, organizasaun internasionál, grupu foin-sa'e, ONG, no setór privadu sira. Sira ko'alia, fahe ideia, no foti desizaun sira hodi enkoraja asaun no hetan solusaun.



Diskusaun sira-ne'e bele akontese iha enkontru formál ka fatin informál sira, no sira fleksivel no bele ajusta tuir tempu. ida ne'e akontese iha nivel oioin hosi lokál no nasionál to'o rejionál no globál atu nune'e ema hotu bele hala'o papél ida hodi proteje planeta.

Tanbasá mak Governasaun Klimátika Importante?

Governasaun klimátika importante tanba ida-ne'e forma ita-boot nia futuru.

Desizaun sira ne'ebé halo ohin kona-ba mudansa klimátika afeta ita-boot nia edukasaun, oportunidade serbisu, saúde, ai-han, bee, no seguransa. Buat sira-ne'e maka foin-sa'e sira depende ba agora no sei depende liután iha tinan sira tuirmai.

Desizaun sira kona-ba klimátika labele halo de'it hosi ema adultu sira ka governu sira. Foin-sa'e sira mai ho ideia foun, koñesimentu lokál, no esperiênsia réal hosi sira-nia comunidade. Bainhira foin-sa'e sira inklui iha konsultasaun, konsellu, no fórum sira kona-ba klimátika, desizaun sira sai justu liu, realistiku liu, no relevante liu.

Regra klimátika ne'ebé forte no koordenasaun ne'ebé di'ak ajuda hamenus risku sira hanesan inundasaun, bailoro naruk, falta ai-han, no dezastre sira. Lahó polítika no lideransa ne'ebé klaru, impaktu klimátiku sira bele sai forte liután, hodi tau foin-sa'e sira-nia moris, mehi, no oportunidade sira iha risku laran.



Governasaun klimátika kria oportunidade ba foin-sa'e sira

Polítika klimátika ne'ebé klaru sei loke odamatan ba serbisu verde, edukasaun klimátika, inovasaun, no dezvoltamentu abilidade sira.

Ida-ne'e ajuda foin-sa'e sira atu prepara ba kareira sira iha futuru ba enerjia renovável, agrikultura sustentável, protesun ambientál, teknolojia, no lideransa komunitária




Governasaun klimátika liga asaun lokál ba mudansa globál

Saida maka foin-sa'e sira halo iha eskola, Suku, no comunidade sira-ne'e importante. Asaun lokál sira bele influensia planu nasionál sira nomós kompromisu internasionál sira. Iha tempu hanesan, akordu globál sira orienta governu sira atu apoia asaun ne'ebé lidera hosi foin-sa'e sira iha nivel lokál.



Governasaun klimátika promove justisa no responsabilidade

Governasaun klimátika ajuda garante fahe responsabilidade ba ema hotu, no apoiu to'o iha sira ne'ebé afetadu liu husi mudansa klimátika, inklui juventude no jerasaun future nian. Ida ne'e kona-ba justisa, igualdade, no proteje ema hotu nia direituatu ba futuru ne'ebé seguru.





SEKSAUN 2 — GOVERNASAUN KLIMÁTIKA IHA TIMOR-LESTE



Oinsá Governasaun Klimátika Funsiona iha Timor-Leste

Governasaun klimátika rona hanesan komplikadu, maibé iha Timor-Leste tuir fluxu ida ne'ebé klaru hosi nivel globál to'o ba comunidade lokál sira:



Oinsá sistema ne'e funsiona iha prátika



Nivel globál – Estabelese diresaun

Timor-Leste halo parte iha resposta globál ba mudansa klimátika liuhosi akordu internasionál konaba klimátika hanesan UNFCCC, inklui Akordu Paris. Akordu globál sira-ne'e halibur nasaun sira hodi konkorda kona-ba fahe objetivu sira porezemplu hamenus emisaun gás ho efeito estufa no adapta ba impaktu klimátiku nian.

Maske nune'e, sira la hatete loloos ba nasaun sira saida maka sira tenke halo. Nasaun idak-idak, inklui Timor-Leste, deside oinsá atu foti asaun bazeia ba nia kontestu nasional, nesesidade, no kapasidade rasik. Ho maneira ida-ne'e, desizaun globál sira fornese diresaun, bainhira governu nasional sira hili maneira ne'ebé funsiona di'ak liu ba sira-nia povu



Nivel nasional – Planeamentu no koordenasaun

Iha nivel nasional, Governu Timor-Leste muda kompromisu sira kona-ba klimátika globál ba planu, polítika, no estratéjia nasional sira.

Ida-ne'e inklui estabelese prioridade sira ba:



Adaptasaun : oinsa nasaun prepara ba no responde ba impaktu klimatika



Mitigasaun : oinsá bele hamenus emisaun sira karik posivel

Nivel nasional mós serbisu atu asegura katak mudansa klimátika integradu iha setór oioin, hanesan agrikultura, bee, saúde, edukasaun, infraestrutura, no jestaun risku dezastre nian nune'e asaun klimátika la halo tratadu hanesan kestaun/problema ketak ida.

Papél importante seluk hosi nível nasional maka koordenasaun no sensibilizasaun, liuliu ba autoridade munisípiu no lokál sira. Instituisaun nasional sira halo koordenasaun entre ministériu sira, mobiliza rekursu sira, fó matadalan, no relata progresu sira ba ONU no parseria internasionál sira.



Nivel munisípiu – Transforma planu sira ba asaun

Autoridade munisípiu sira maka fatin ne'ebé planu klimátiku sira hahú sai asaun loloos iha terenu. Iha nivel ida-ne'e, prioridade klimátika sira integradu iha:

- ★ Planu dezvoltamentu munisípiu nian;
- ★ Orsamentu anuál;
- ★ Programa setór (agrikultura, bee, estrada, saúde, redusaun risku dezastre).



Eskritóriu munisipál sira adapta planu klimátiku nasional ba realidade lokal, hodi responde ba risku espesífiku hanesan inundasaun, bailoron naruk, rai-halai, ka erozaun tasi-ibun. Sira mós iha papel importante atu identifika área vulnerável, risku klimátiku, no prioridade lokal sira, no fahe informasaun ne'e ho nivel nasional atu ajuda dezenha programa no projetu klimátiku ne'ebé efetivu liu.




Nivel comunidade – Impaktu iha moris-reál

Ida-ne'e maka governasaun klimátika nian importante tebes. Koordinasaun forte entre nivel nasional no munisípiu tenke rezulta mudansa réal iha ema-nia moris loroloron iha nivel comunidade.

Komunidade sira esperiênsia asaun klimátika liuhosi:

- ★ Sistema bee ne'ebé seguru no garantidu liu
- ★ Prátika agrikultura ne'ebé reziliente ba klimátika
- ★ Preparasaun di'ak liu ba dezastre no alerta sedu
- ★ Protesaun ai-parapa no restaurasaun ekosistema
- ★ Atividade sensibilizasaun no edukasaun


Mudansa sira ne'ebé ita bele haree mak prova katak desizaun global, planu nasional, no asaun munisipál sira servisu hamutuk atu kria impaktu pozitivu ba comunidade sira. Bainhira ligasaun ida-ne'e forte, governansa klimátika sai significativu, prátiku, no foka ba ema.



Ezemplu koordinasaun lokal hafoin inundasaun:

Autoridade munisipál sira halibur informasaun husi suku sira kona-ba impaktu inundasaun, no fahe informasaun ne'e ba institusaun nasional sira ne'ebé responsavel ba jestaun dezastre no planeamentu klimátiku. Bazeia ba informasaun ne'e, sira serbisu hamutuk ho ministériu relevante sira no parseiru dezvoltamentu atu hadi'a drenajen, hadi'a estrada, no planeia fatin ne'ebé seguru liu ba edifísiu públiku sira.

Atór Klimátika Prinsipál sira iha Timor-Leste



Impaktu sira hosi mudansa klimátika maka entre setór sira; tanba ne'e asaun klimátika envolve atór barak ne'ebé serbisu iha nivel oioin. Komprende sé maka halo saida, ajuda ita-boot atu hatene atu envolve iha ne'ebé, no sé maka ita-boot atu hakbesik.



1 Nivel Lokál – Besik liu ba Povu

 **Konsellu Suku no lider aldeia sira** mak besik liu ba comunidade no sira reprezenta comunidade nia lian. Sira-nia papél inklui serbisu besik ho comunidade atu identifika risku no prioridade klimátika lokál, koordena ho nivel nasionál atu hetan oportunidade atu rezolve sira-nia problema, no mobiliza comunidade sira durante dezastre.

 **Eskola, grupu juventude, Organizasaun Sosiedade Sivil no grupu igreja.** Grupú sira ne'e hala'o papél importante hodi tulun iha sensibilizasaun ka kampaña kona-ba mudansa klimátika, lidera atividade sira ne'ebé relasiona ho klimátika maka hanesan kuda ai-horis, hamoos, ka hala'o peskiza iha nivel comunidade.

 **Komitê dezastre lokál** sira hala'o papél importante hodi prepara comunidade sira atu hatán ba dezastre sira, porezemplu inundasaun, rai-maran, no anin-boot no kontribui hodi apoia prosesu alerta antesipada/sedu, evakuasaun no rekuperasaun.

2 Nivel Munisípiu – Ligasaun ba Planu no Prátika

 Autoridade munisípiu sira servisu besik ho eskritóriu setór sira hodi adapta planu nasionál kona-ba klimátika ba nesesidade lokál no fornese servisu sira. Sira maka responsavel ba:



Agrikultura no seguransa ai-han



Saúde no edukasaun



Bee no saneamentu



Jestaun risku dezastre



Infraestrutura no estrada

 Planeamentu munisípiu permite sira atu identifika sira-nia prioridade prinsipál sira hodi integra sira iha planu dezvoltamentu munisípiu nian, no atu hetan possibilidade hodi mobiliza fundu.



Nivel Nasionál – Polítika, Koordenasaun, no Lideransa



Diresaun Nasionál Mudansa Klimátika iha Ministériu Turizmu no Ambiente nia okos maka instituisaun governu nian ne'ebé lidera kona-ba mudansa klimátika. Diresaun ne'e responsavel ba koordenasaun entre ministériu sira, lidera dezvoltamentu polítika klimátika, representa Timor-Leste iha nível internasionál, no lidera Grupu Traballu konaba Mudansa Klimátika (WG-CC)

Ministériu xave sira ne'ebé iha responsabilidade kona-ba klimátika. Mudansa klimátika afeta setór hotu-hotu, la'ós de'it ambiente. Tanba ne'e mak ministériu barak mak involve, lidera husi Ministériu Turizmu no Ambiente, liña ministériu sira inklui:



Ministériu Planeamentu no Investimentu
Estratéjiku



Ministériu Obras Públiku



Ministériu Transporte no Komunikaun



Ministériu Agrikultura, Pekuária, Peskas no Floresta



Ministériu Saúde



Ministériu Edukasaun



Ministériu Solidariedade Sosiál no Inklusaun



Ministériu Interiór



Tanba nia intersetoriál, iha Timor-Leste iha Grupu Traballu ida ne'ebé estabelese ona konaba Mudansa Klimátika (WG-CC), ne'ebé hetan ona rekoñesimentu ofisiál iha 25 Janeiro 2017 hosi Diploma Ministeriál No. 2/2017. Grupu ne'e halibur governu, sosiedade sivil, parseria dezvoltamentu, no foin-sa'e sira hodi fahe informasaun ka dadus, atualiza konaba projetu/programa relasiona ho mudansa klimátika hodi evita duplikasaun, fahe prátika di'ak liu ka ideia projetu, koordena asaun sira no grupu ne'e organiza hela Konferénsia Nasionál Mudansa Klimátika tinan rua nian hodi espalla informasaun kona-ba mudansa klimátika. Konferénsia ne'e implementa dala lima ona.

4

Organizasaun Sosiedade Sivil (OSS) no ONG sira



Organizasaun sosiedade sivil no ONG sira iha papél krítiku iha asaun klimátika tanba sira serbisu direktamente ho comunidade sira. Sira komprende realidade lokál sira, rona preokupasaun comunidade nian, no ajuda interpreta planu nasionál klimátika ba atividade sira iha baze liu. Lihosi envolvimentu besik liu, OSS sira dala barak hetan grupu vulnerável sira hanesan feto, foin-sa'e, agrikultór, no comunidade konstál sira ne'ebé afetadu liu hosi mudansa klimátika.



Organizasaun sira-ne'e mós halo pilotu ba solusaun inovativu sira. Sira koko ideia foun sira hanesan agrikultura matenek-klimátika ka prátika konservasaun bee nian, preparasaun ba dezastre baze-komunidade, restaurasaun ai-parapa nian, ka teknolojia te'in nian ne'ebé moos iha eskala ki'ik. Bainhira solusaun sira-ne'e funsiona, sira bele aumenta ka adota ba programa governu nian.



Aleinde ne'e, OSS no ONG sira hala'o papél hodi defende asaun klimátika ne'ebé inkluzivu no justu. Sira hasa'e comunidade nia lian, promove partisipasaun hodi foti desizaun, no ajuda asegura katak polítika klimátika konsidera ekuidade, direitus umanus, no nesesidade grupu marjinalizadu sira-nian. Advokasia ida-ne'e ajuda halo governasaun klimátika sai sentralizadu liu ba ema no responsabiliza.

5


Akademia no Instituisaun Peskiza



Akademia no instituisaun peskiza (universidade sira) kontribui liuhosi fornese dados, evidénsia, no análise ne'ebé informa hodi foti desizaun kona-ba klimátika. Lihosi peskiza no monitorizasaun, sira ajuda identifika tendénsia klimátika, avalia risku sira, no komprende impaktu sira hosi mudansa klimátika ba setór sira hanesan agrikultura, bee, saúde, no ekosistema sira iha Timor-Leste.



Sira mós apoia edukasaun no peskiza kona-ba klima, inklui formasaun ba estudante sira, foin-sa'e sira, no profisionál sira kona-ba siénsia klima nian, adaptasaun, no dezvoltamentu sustentável. Universidade no sentru peskiza sira ajuda harii kapasidade nasional liuhosi dezvoltave péritu lokal envezde depende de'it ba koñesimentu esternu/liur.



Importante, akademia ajuda ema sira ne'ebé foti desizaun atu komprende risku no opsaun sira. Hodi interpreta deskobrimentu sientífiku sira ba informasaun asesivel, peskizadór sira apoia ema sira ne'ebé halo polítika hodi dezeña planu sira di'ak liu, fó prioridade ba asaun sira, no evita desizaun sira ne'ebé bele aumenta vulnerabilidade klimatika.

6

Setór Privadu



Setór privadu hala'o papél ida ne'ebé mak kontribui ba governasaun klimatika liuhosi investe iha enerjia renovável no empregu verde sira. Negósiu sira bele suporta enerjia solár, efisiénsia enerjética, agrikultura sustentável, jestaun lixu, no solusaun sira seluk ne'ebé amigavel ba klima ne'ebé kria empregu enkuantu hamenus impaktu ambiental.



Iha tempu hanesan, setór privadu influensia emisaun no utilizaun rekursu liuhosi ninia prátika produsaun, transporte no konsumu. Ida-ne'e signifika katak negósiu sira bele kontribui ba problema klimatiku sira ka ajuda hamenus sira, depende ba oinsá sira funsiona.



Bainhira hetan orientasaun hosi polítika no insentivu sira ne'ebé klaru, setór privadu bele sai parte xave ida hosi solusaun sira ba klimatika. Parseria sira entre governu, negósiu sira, no comunidade sira bele lori inovasaun, mobiliza finansu, no apoia dezvoltamentu sustentável hodi halo asaun klimatika sai práticu no ekonomikamente viável.

Instrumentu Xave ba Klimátika Nasionál



Atu komprende risku klimátiku sira, no prioridade nasionál sira, ita presiza hatene kona-ba instrumentu klimátika nasionál sira. Instrumentu klimátiku nian maka planu no relatóriu sira ne'ebé ajuda Timor-Leste transforma promesa sira kona-ba klimátika nian ba iha asaun. Sira esplika saida maka nasaun ne'e komete atu halo, oinsá prepara ba impaktu klimátiku sira, no oinsá progresu sira hetan akompañamentu no fahe ba mundu.

Política Nasionál kona-ba Mudansa Klimátika

Política Nasionál ba Mudansa Klimátika Timor-Leste nian mak nasaun-nia matadalan prinsipál kona-ba oinsá governu, comunidade, no parseria sira responde ba mudansa klimátika. Ida-ne'e liga ho kompromisu globál sira tuir Konvensaun Kuadru Nasoins Unidas nian kona-ba Mudansa Klimátika (UNFCCC) ho objetivu dezvoltimentu nasionál nian no realidade lokál sira.

Política ne'e nia objetivu atu:



Proteje ema no meu-moris sira hosi impaktu klimátiku sira maka hanesan inundasaun, rai-maran, no nivel tasi sa'e



Hametin dezvoltimentu reziliente ba klimátika, liuliu iha agrikultura, bee, saúde, no infraestrutura



Hamenus emisaun sira iha ne'ebé posivel, enkuantu foka liuliu ba adaptasaun



Promove koordinasaun entre governu, munisípiu, comunidade, no parseria sira

Kontribuisaun Nasionál Determinadu (NDC)

NDC nu'udar promesa ofisiál kona-ba klimátika Timor-Leste nian ba mundu tuir Konvensaun Kuadru Nasoins Unidas nian kona-ba Mudansa Klimátika no Akordu Paris nian. Ida-ne'e esplika saida maka nasaun ne'e planeia atu halo hodi rezolve mudansa klimátika, tantu liuhosi hamenus emisaun sira ne'ebé posivel no liuhosi adaptasaun ba impaktu klimátiku sira hanesan inundasaun, rai-maran, no nível tasi nian sa'e

NDC trasa setór sira ne'ebé maka importante liu hanesan agrikultura, bee, enerjia, saúde, no redusaun risku dezastre no identifika iha ne'ebé maka presiza apoiu internasionál. NDC atualiza beibeik (kada tinan lima), ne'ebé signifika katak iha oportunidade ba foin-sa'e sira nia lian, ideia sira, no advokasia atu influensia kompromisu sira iha futuru. Tinan ida ne'e Timor-Leste atualiza nia NDC 2022-2030 ba NDC 3.0.

Planu Adaptasaun Nasionál (NAP)

NAP ne'e foka ba adaptasaun ne'ebé signifika prepara no hasoru impaktu sira husi mudansa klimátika ne'ebé akontese daudaun ona. Timor-Leste sai vulnerável tebes ba tempu ne'ebé estremu, inseguransa ai-han, no adaptasaun ba erozaun kostál ne'e importante liu.

NAP identifika asaun prioridade sira hanesan agrikultura resiliente ba klimátika, jestaun bee, protesaun saúde, restaurasaun ekosistema, no preparasaun ba dezastre. Ida-ne'e dezeña hanesan planu ba tempu naruk, gia desizaun governu nian nune'e dezvoltamentu ohin loron la aumenta risku klimátiku sira iha futuru.



Foin-sa'e sira tenke hatene katak NAP afeta diretamente comunidade sira no meu-moris sira. Bainhira planu adaptasaun sira implementa ho dí'ak, sira bele ajuda proteje to'os, uma, eskola, no área kostál sira. Bainhira sira la implementa, comunidade sira nafatin espozitu/afetadu

Aleinde NDC no NAP, Timor-Leste prepara relatóriu nasionál oioin ne'ebé submete ba UNFCCC. Relatóriu sira-ne'e esplika:



Asaun saida maka nasaun ne'e halo ona




Progresu saida maka halo ona



Dezafiu no lakuna saida maka sei iha



Apoiun saida maka presiza husi parseria internasionál sira



Relatóriu sira ne'e importante tanba kria transparénsia no responsabilizasaun. Sira permite comunidade internasionál no Timor-Leste nia sidadaun rasik atu haree karik promesa sira konaba klimátika tuir duni ho asaun. Timor-Leste nia Komunikasaun Nasionál dahuluk prepara no submete ba UNFCCC nu'udar Komunikasaun Nasionál Inisiál (INC) iha 2014. Dokumentu ne'e deskreve inventáriu inisiál nasaun nian kona-ba emisaun gás ho efeitu estufa, avaliasaun vulnerabilidade, no asaun klimátika.


Timor-Leste submete ninia Komunikasaun Nasionál Daruak (SNC) iha Novembru 2020.

Relatóriu ida-ne'e atualiza komunikasaun dahuluk ho dadus ne'ebé foin lalais liu kona-ba emisaun, medida adaptasaun, no polítika klimátika, no fornese informasaun hodi apoia relatóriu no planeamentu globál.



The background of the entire page is a tropical sunset scene. In the upper right, a large, pale yellow moon hangs in a sky with soft, wispy clouds. A flock of small black birds is scattered across the sky, some flying towards the right. In the lower half, the silhouettes of three palm trees are visible against the horizon. The foreground is a deep blue sea with horizontal, wavy lines representing the water's surface.

SEKSAUN 3 — GOVERNASAUN KLIMÁTIKA INTERNASIONÁL: OINSA MUNDU DESIDE KONA- BA ASAUN KLIMÁTIKA



Saida mak Governansa Klimátika Internasionál?



Governansaun klimátika internasionál refere ba oinsá nasaun sira serbisu hamutuk hodi hatán ba mudansa klimátika. Liuhosi negosiasaun globál, governu sira konkorda kona-ba regra, responsabilidade no asaun sira ne'ebé fahe hodi hamenus emisaun sira, adapta ba impaktu klimátiku sira, no apoia nasaun sira ne'ebé afetadu liu.



Negosiasaun sira-ne'e importante tanba mudansa klimátika la para de'it iha fronteira sira. Desizaun sira ne'ebé halo iha nivel globál influensia lei nasional sira, planu klimátiku sira, finansiamentu, no asaun réal sira iha terrenu. Governansaun klimátika internasionál hetan orientasaun hosi prinsipiu “**komún maibé responsabilidade diferenciadu**”, ne'ebé rekoñese katak nasaun hotu-hotu tenke halo asaun kona-ba mudansa klimátika, maibé la'ós hotu-hotu iha responsabilidade ka kapasidade istórika hanesan atu hatán.




Envolvimentu foin-sa'e sira nian iha negosiasaun klimátika sira importante tebes tanba ida-ne'e forma ohin lora no futuru. Hodi fahe sira nia perspetiva, ideia, esperiênsia, no koñesimentu, foin-sa'e sira bele ajuda influensia diskusaun no desizaun sira kona-ba asuntu xave sira klimátika nian.



Enkontru no konferénsia sira kona-ba negosiasaun klimátika tuir regra espesífiku sira ne'ebé orienta sé maka bele partisipa no oinsá. Komprende sistema sira-ne'e halo sai fásil liu atu envolve iha maneira ida ne'ebé significativu. Iha sesaun ida-ne'e, ita-boot sei aprende oinsá negosiasaun klimátika sira funsiona no maneira oioin ne'ebé ita-boot bele envolve.

Oinsá Negosiasaun Internasionál sira Klimátika nian Funsiona?



Negosiasaun internasionál sira kona-ba klimátika akontese liuliu iha UNFCCC nia okos. Negosiasaun sira-ne'e halibur governu sira no atór barak seluk, inklui governu, sosiedade sivil, organizasaun foin-sa'e sira, sientista sira, ema indíjena sira, setór privadu, no instituisaun internasionál sira.

Delegasaun nasaun sira de'it maka bele foti desizaun formalmente, maibé diálogu ho atór sira seluk influensia maka'as rezultadu sira. Negosiasaun sira akontese liuhosi buat rua:



Espasu formál sira, desizaun sira adota, no



Espasu informál sira, ideia sira diskute no harii kompromisu sira

Governasaun klimátika la'ós eventu ida ne'ebé akontese dala ida de'it, ida-ne'e maka prosesu ida ne'ebé kontinua, tinan tomak ne'ebé atinji pontu aas liu durante Konferénsia anuál hosi Parte siranian (COP).



Órgaun no Instituisaun Prinsipál sira iha Governasaun Klimátika

Sistema klimátiku internasionál inklui órgaun xave oioin:

Konferénsia Parte sira-nian (COP) – Konferénsia Parte sira-nian ba UNFCCC kompostu hosi nasaun hotu-hotu ne'ebé halo parte iha UNFCCC. Ida-ne'e maka órgaun supremu ne'ebé regula implementasaun Konvensaun nian no instrumentu sira ne'ebé iha relasaun.

Konferénsia Parte sira-nian ne'ebé serve hanesan enkontru Parte sira-nian ba Akordu Paris nian (CMA) – Órgaun ida-ne'e foka espesifikamente ba implementasaun no revizaun ba Akordu Paris nian no kompostu hosi nasaun hotu-hotu ne'ebé asina ona Akordu Paris nian. Nasaun sira ne'ebé halo parte iha UNFCCC maibé seidak asina Akordu Paris bele partisipa nu'udar observadór. Papél konferénsia nian mak atu monitoriza Akordu Paris nia implementasaun no foti desizaun sira hodi promote nia implementasaun.

Bureau – Ida-ne'e kompostu hosi representante nasaun nian ne'ebé atribui hosi rejiaun lima. Nia fornese konsellu no orientasaun kona-ba serbisu UNFCCC no Akordu Paris nian.

Órgaun Subsidiáriu sira: Órgaun Subsidiáriu ba Konsellu Sientífiku no Teknolójiku (SBSTA) ida-ne'e fó konsellu kona-ba asuntu siénsia klimátika, ambiente no teknolojia. Ida-ne'e adota konkluzan sira ne'ebé hafoin submete ba Konferénsia Parte sira-nian.

Órgaun Subsidiáriu ba Implementasaun (SBI): foka ba oinsá akordu sira hala'o iha prátika. Ida-ne'e suporta implementasaun UNFCCC no akordu sira ne'ebé halo tuir idane'e. Nia adota konkluzan sira ne'ebé hafoin submete ba Konferénsia Parte sira nian fornese orientasaun kona-ba siénsia no teknolojia.

Sekretariadu UNFCCC – ida-ne'e mak forneseedor prinsipál ba apoiu tékniku no administrativu ba UNFCCC.


Orgaun sira ne'ebé konstitui ona: sira-ne'e forma iha kuadru UNFCCC, Protokolu Kyoto no Akordu Paris nian. Sira nia objetivu atu promove no fasilita diálogo kona-ba asuntu oioin no fasilita implementasaun instrumentu sira. Orgaun konstituidu sira-ne'e inklui:

- Grupu Konsultativu Peritu sira (CGE)
- Komité Permanente ba Finansas (SCF)
- Konsellu Ezekutivu ba Mekanizmu Dezenvolvimentu Limpu (CDM EB)
- Komité ba Konformidade
- Komité Ezekutivu ba Mekanizmu Internasionál Varsóvia kona-ba Lakon no Estragu (WIM ExCom)
- Grupu Servisu Fasilitasaun ba Plataforma Komunidade Lokál no Povus Indijena sira (LCIPP)
- Komité Paris ba Kapasitasaun (PCCB)
- Komité Ezekutivu Teknolojia (TEC)
- Sentru no Rede Teknolojia Klimátika (CTCN)
- Konsellu Fundu Adaptasaun
- Fasilidade Ambientál Globál (GEF)
- Komité Supervizaun Implementasaun Konjunta (JISC)
- Fundu Klimátiku Verde (GCF)

- Painei Intergovernamentál kona-ba Mudansa Klimátika (IPCC) mak kompostu husi sientista no peritu sira hosi mundu tomak ne'ebé servisu kona-ba asuntu sira relasiona ho mudansa klimátika. IPCC la'ós parte husi UNFCCC, maibé fornese informasaun sientífika ba nasaun sira atu hametin resposta globál ba mudansa klimátika.
- Mekanizmu finanseiru sira: asisténsia finanseira disponivel husi nasaun sira ne'ebé iha rekursu barak liu ba nasaun sira ne'ebé iha rekursu menus no vulnerável liu ba impaktu mudansa klimátika. Atu fasilita ida-ne'e, UNFCCC estabeselese Mekanizmu Finanseiru, ne'ebé mós hanesan resposta ba arranju finanseiru ne'ebé estabeselese iha Akordu Paris. Mekanizmu sira-ne'e implementa ka supervizona husi órgaun konstituídu sira hanesan Komisaun Permanente ba Finansas (SCF), Konsellu Fundu Adaptasaun nian, Fasilidade Ambiente Globál (GEF), no Fundu Klimátiku Verde (GCF)

Sé mak Partisipa iha Negosiasaun Klimátika?

Negosiasaun klimátika halibur atór oioin, idak-idak ho nia papél no responsabilidade rasik.



Nasaun sira (Parte sira)



Iha UNFCCC, Parte ida maka nasaun ida ne'ebé ofisialmente tama ona iha Konvensaun. Idane'e signifika nasaun asina no depozita ona dokumentu UNFCCC no kompleta ona ninia prosesu aprovasaun nasional. Nasaun sira ne'e iha direitu tomak atu partisipa iha negosiasaun no foti desizaun.

Nasaun sira ne'ebé seidakuk kompleta prosesu ida-ne'e bele mos tuir enkontru sira, maibé hanesan observadór deit, ne'ebé signifika katak sira la bele halo negosiasaun ka halo desizaun.

Parte sira hasoru malu regularmente iha Konferénsia Parte sira-nian (COP). Ba objetivu organizasionál sira, nasaun sira fahe ba bloku rejional lima:



Áfrika



Ázia



Europa Sentrál no Leste



Amérika Latina no Karibe




Europa Osidentál no sira seluk (inklui Austrália, Kanadá, Islândia, Nova Zelândia, Noruega, Suisa, no Estados Unidos)




Tinan-tinan, nasaun sira mós hili Prezidénsia COP ida no membru sira Bureau/meza nian molok sesaun hahú. Prezidénsia normalmente hili hosi rejaun ne'ebé sai uma-na'in ba COP tinan ne'ebá nian no ajuda orienta diskusaun sira no jere enkontru. Sistema rotasaun ida-ne'e garante representasaun rejional ne'ebé justu no enkoraja partisipasaun tomak.

Observadór sira



Observadór sira maka grupu no organizasaun sira ne'ebé akompaña no kontribui ba negosiasaun sira kona-ba klimátika, maski sira la halo desizaun finál. Katégoria observadór sira inklui:

-  Ajénsia no órgaun ONU nian
-  Organizasaun Povu Indíjena nian
-  Organizasaun intergovernamentál
-  Organizasaun naun-governamentál (ONG)



Atu ONG sira bele partisipa iha negosiasaun hanesan observadór, sira tenke aplika no hetan aprovasaun husi Sekretariadu UNFCCC. Sira mos presiza submete dokumentu sira ne'ebé hatudu konstituénsia saida mak sira pertense ba.

Bainhira hetan admisaun, ONG sira organiza bazeia-ba interesse no perspetiva hanesan. Eleitoradu sira-ne'e ofisialmente rekoñese hosi UNFCCC no idak-idak iha pontu fokál ne'ebé komunika ho Sekretariadu.

-  ONG Negósiu no Indústria (BINGO)
-  ONG Ambientál (ENGO)
-  Autoridade Governu Lokál no Munisípal (LGMA)
-  Organizasaun Povu Indíjena sira (IPO)
-  ONG Peskiza no Independente (RINGO)
-  ONG Sindikatu (TUNGO)
-  Konstituénsia Feto no Jéneru (WGC)
-  ONG Juventude (YOUNGO)
-  Feto no Mane Toos Nain (Farmers)


Partisipasaun Foin-sa'e sira

Foin-sa'e sira iha direitu atu envolve iha foti desizaun kona-ba klimátika. Foin-sa'e sira bele participa iha negosiasaun internasionál kona-ba klimátika liuhosi:

-  Hamutuk ho nasaun-nia delegasaun ofisiál
-  Partisipa liuhosi ONG sira ne'ebé akreditadu ba UNFCCC
-  Envolve liuhosi YOUNGO, eleitoradu ofisiál foin-sa'e nian iha sistema UNFCCC nia laran



Grupu Negosiasaun no Aliansa sira



Iha negosiasaun klimátika internasional, nasaun sira normalmenti servisu hamutuk iha grupu negosiasaun ka bloku. Grupu sira ne'e forma tanba iha nasaun barak liu (besik nasaun 200) ne'ebé partisipa iha negosiasaun klimátika, no difísil tebes se kada nasaun negosia mesak. Bainhira nasaun sira servisu iha grupu, sira bele koordena sira-nia pozisaun, ko'alia ho lian ida ne'ebé forte liu no negosia ho maneira ne'ebé efisiente liu.

Normalmente, grupu sira forma tuir interese hanesan, pozisaun polítika, rejiaun jeográfiku, ka situasaun ekonomika. Sira bele sai grupu rejionál, koligasaun bazeia-ba asuntu, ka aliansa polítika hanesan.

1

ALBA (Aliansa Bolivariana ba Povu sira Ita-nia Amérika nian)

Inklui Bolívia, Kuba, Ekuadór, Nikarágua, no Venezuela.

2

Aliansa Estadu Illa Kiik sira (AOSIS)

Koligasaun hosi ~40 nasaun illa no rai-tetuk ne'ebé vulnerável ba aumentu nível tasi nian no impaktu klimátiku

3

AILAC (Aliansa Independente Amérika Latina no Karibe nian)

Inklui Xile, Kolómbia, Kosta Rika, Guatemala, Honduras, Panamá, Paraguai, no Peru.

4

G77 no Xina

Koligasaun boot ida ne'ebé representa nasaun dezvoltamentu sira no Xina.

5

Grupu Afrikanu

Subgrupu ida iha G77 nia laran ne'ebé kompostu hosi 53 nasaun Afrikanu.

6

Grupu BÁZIKU

Inklui Brazil, Áfrika-Súl, Índia, no Xina — ekonomia emerjente boot sira ho influénsia signifikativu.

7

Grupu CACAM

Representa Ázia Sentrá, Káukazu, Albánia, no Moldova.

8 Grupu Nasaun Menus Dezenvolidu (LDC)

Inklui 48 nasaun ne'ebé Nasoins Unidas klasifika hanesan Menus Dezenvolidu.

9 Estadu Árabe sira

Grupu rejionál hosi Médiu Oriente no Áfrika Norte.

10 Grupu Integridade Ambientál (EIG)

Inklui Georgia, Liechtenstein, Méxiku, Mónako, no Suisa.

11 Grupu Sumbriña

Koligasaun hosi nasaun dezenvolidu hanesan Austrália, Kanadá, Japaun, Nova Zelândia, Noruega, EUA, no seluk tan.

12 Organizasaun Nasaun Esportadór Petróleu nian (OPEC)

Inklui Argélia, Iraun, Irak, Arábia Saudita, Venezuela, no seluk tan

13 Sistema Integrasaun Amérika Sentrá (SICA)

Inklui Costa Rica, El Salvador, Guatemala, Honduras, Nikarágua, no Panamá.

14 Uniaun Europeia (UE)



Kompostu hosi 27 Estadu membru UE, ne'ebé halo negosiasaun hanesan bloku ida.

Tanbasá Maka Grupu Sira-ne'e Importante



Dalabarak nasaun sira pertense ba grupu negosiasaun ida ka liu, depende ba kestaun ne'ebé diskute hela. Grupu sira-ne'e hala'o papél xave ida hodi forma negosiasaun klimátika sira no ajuda nasaun sira atu koordena estratéjia sira, fahe informasaun, no harii konsensu.

Aleinde enkontru formál sira, grupu negosiasaun sira mós ligadu nafatin liuhosi plataforma informál no dijitál sira, ne'ebé sira troka opiniaun regularmente no ajusta sira-nia pozisaun bainhira negosiasaun sira evolui.



Espasu Sira Ne'ebé Akontese Negosiasaun No Advokasia

Negosiasaun no advokasia internasionál kona-ba klima akontese iha tipu espasu oioin iha UNFCCC nia okos. Espasu sira-ne'e bele formál ka informál, no ida-idak iha papél iimportante atu forma desizaun klimátika. Komprende oinsá espasu sira-ne'e funsiona sei ajuda ita atu haree iha ne'ebé no oinsá ita bele influensia rezultadu sira.



Espasu Formál



Sesaun Plenária

Negosiasaun ofisiál sira hala'o iha reuniaun plenária COP nian no ninia akordu sira, hanesan CMA. Sesaun sira-ne'e maka fatin ne'ebé nasaun sira apresenta sira nia pozisaun formál no fatin ne'ebé testu negosiadu adota ofisialmente. Nasaun hotu-hotu, observadór akreditadu sira, no mídia bele tuir, no interpretasaun fornese iha lian ONU oioin atu nune'e ema hotu bele akompaña diskusaun sira.

Espasu Informal



Grupu Informál


Prezidente COP nian ka Prezidente hosi órgaun apoiu ida dalabarak organiza enkontru informál sira hodi ajuda nasaun sira hetan akordu kona-ba asuntu sira ne'ebé difisil molok sira filafali ba sesaun formál sira. Enkontru sira-ne'e normalmente iha partisipante uitoan liu, hala'o iha sala ki'ik liu, no dala barak hala'o iha Inglés. Tanba fatin limitadu, delegasaun hotu-hotu la bele tuir reuniaun informl hotu-hotu, no sira ne'ebè la marka prezensa bele iha influnsia menus ba desizaun balu.



Tipu Grupu Negosiasaun Informál sira

-  Grupu Kontaktu sira – Enkontru sira ne'ebé harii hosi COP ka órgaun subsidiáriu sira hodi diskute tópiku negosiasaun espesífiku sira
-  Grupu Kontaktu Konjuntu – Sesaun sira iha ne'ebé grupu kontaktu oioin halibur hamutuk hodi rezolve kestaun sira ne'ebé iha relasaun.
-  Grupu Redasaun sira – Grupu ki'ik sira hosi delegadu sira ne'ebé maka voluntáriu ka hili atu ajuda hakerek ka hadi'a testu negosiasaun nian.
-  Prezidente nia Belun sira – Grupu sira hosi negosiadór sira ne'ebé iha esperiénsia ne'ebé hetan konvite hosi Prezidente atu ajuda harii kompromisu no akordu informál kona-ba asuntu sira ne'ebé sensível.
-  Segmentu sira ho Nivel Aas– Sesaun sira ne'ebé envolve líder polítiku sira no ofisiál superiór sira, iha ne'ebé nasaun sira fornese diresaun no apoiu polítiku hodi loka negosiasaun sira ne'ebé difisil no finaliza akordu sira
-  Eventu no Espozisaun sira – Fatin sira hodi fahe peskiza, esperiénsia sira, no solusaun sira.
-  Enkontru Bilateral – Diskusaun ida-idak entre nasaun ka grupu sira
-  Konferénsia Imprensa no Envolvimentu Mídia – Uza atu komunika rezultadu negosiasaun no influensia opiniaun públika.

Prosesu Negosiasaun Klimátika



To'o agora, ami esplora ona instituisaun sira ne'ebé maka funsiona tuir UNFCCC no oinsá nasaun sira hetan akordu sira kona-ba klimátika. Ami mós haree ona iha ne'ebé no oinsá ema sira bele partisipa iha negosiasaun sira, tantu iha espasu formál no informál sira. Buat ne'ebé importante atu komprende maka negosiasaun internasionál sira kona-ba klima la akontese iha momentu ida de'it. Envezde, sira maka konutinuasaun prosesu ida, tinan tomak ne'ebé harii pasu ba pasu no to'o ba desizaun xave sira iha COP anuál.

Oinsá Siklu Negosiasaun Funsiona



Negosiasaun klimátika tuir siklu ida ne'ebé la'o iha tinan tomak, muda hosi diskusaun téknika sira ba desizaun polítika sira ho nivel aas.

1 **Serbisu Tékniku Tinan Tomak**

Iha inísiu tinan, negosiasaun sira hahú ho:

- ★ Enkontru virtuál no interseksionál sira
- ★ Enkontru bilaterál sira, konsultasaun sira, no eventu sekundáriu sira

Durante faze ida-ne'e, nasaun sira diskute asuntu tékniku sira no hahú forma ideia no pozisaun sira.

2 **Diskusaun Temátika no Serbisu Informál**

Enkuantu diskusaun sira sai klean liután, nasaun sira serbisu liuhosi:

- ★ Órgaun konstituidu sira, foka ba tema/tópiku espesífiku sira
- ★ Grupu kontaktu sira, negosiadór sira serbisu iha ajenda partikulár sira
- ★ Sesaun informál sira, ajuda rezolve dezentendimentu sira no opsaun sira ne'ebé limtadu
- ★ Eventu no workshop sira, fahe ideia, esperiénsia, no evidénsia sira



Etapa ida-ne'e krusiál atu harii komprensaun no akordu informál molok foti desizaun formál sira.

3 **Papel hosi Órgaun Subsidiáriu sira (SBI & SBSTA)**

Órgaun subsidiáriu prinsipál rua hala'o papél sentrál:

- ★ SBSTA foka ba asuntu sientífiku, tékniku, no metodolójiku sira
- ★ SBI trata kona-ba implementasaun, finansa, kapasitasaun, no relatóriu



Órgaun rua ne'e hasoru malu iha sesaun plenária, iha ne'ebé sira adota konkluziun ne'ebé halo rezumu ba progresu no orienta pasu sira tuir mai.

4 **Hosi Serbisu Tékniku ba Desizaun Polítika**

Konkluziun sira hosi SBSTA no SBI fó ba:

- ★ Sesaun plenária sira COP nian, desizaun finál sira tuir UNFCCC adota
- ★ CMA nia sesaun plenária sira, iha ne'ebé desizaun sira ne'ebé relasiona ho Akordu Paris nian halo



Iha interasaun konstante entre órgaun subsidiáriu sira no órgaun sira ne'ebé foti desizaun iha plenária, hodi aseguza katak diskusaun téknika sira informa rezultadu polítiku sira.

5 **COP: desizaun sira finaliza iha ne'e**

Prosesu ne'e to'o nia pontu aas liu durante sesaun COP, ne'ebé baibain hala'o iha tinanikus/rohan. Iha ne'e:

- ★ Testu sira ne'ebé negocia ona finaliza ona
- ★ Halo kompromisu polítiku sira
- ★ Desizaun ofisiál sira adota ona




Depois COP remata, siklu ida ne'e hahú fali atu prepara ba negosiasaun tinan tuirmai.



Durante tinan ida nia laran, órgaun subsidiáriu no grupu traballu sira hasoru malu iha UNFCCC hodi diskute asuntu espesífiku sira ne'ebé liga ba sira-nia mandatu. Sira nia knaar maka atu serbisu liuhosi pergunta téknika no polítika no prepara konklusaun sira depois lori ba hato'o iha COP.

Atu apoia serbisu ida-ne'e, órgaun konstituidu sira ne'ebé kria tuir UNFCCC ka ninia akordu sira hasoru malu regularmente atu avansa progresu iha sira-nia área ne'ebé atribui ba sira. Grupu negosiasaun no mekanizmu koordinasaun sira mós hasoru malu hodi troka hanoin, aliña pozisaun, no dezenvolve proposta hamutuk.



Preparasaun ba COP: Pre-COP

Molok COP, hala'o Sorumutuk Preparatoriu (Pre-COP). Ida-ne'e fó oportunidade ba nasaun sira atu:



Diskute asuntu polítiku xave sira antes



Klarifika pozisaun sira



Koko atu rezolve dezentendimentu sira sedu

Pre-COP ajuda harii momentum no halo fasil liu atu hetan akordu durante COP ne'e rasik.

Hahú COP

Iha inísiu COP, nasaun sira hasoru malu iha sesaun plenária atu aprova oficialmente agenda reuniaun nian. Agenda ida ne'e inklui tópiku sira no esbosu konklusaun ne'ebé mai hosi órgaun subsidiáriu sira no prosesu seluk iha UNFCCC.

Negosiasaun sira Durante COP

Bainhira COP hahú:

-  Asuntu sira diskute iha plenária órgaun subsidiáriu sira
-  Grupu kontaktu sira no sesaun informál sira harii atu serbisu liuhosi pergunta sira ne'ebé seidak rezolve no esbosu testu negosiasaun nian
-  Prezidente bele organiza konsultasaun informál sira ho grupu negosiasaun espesífiku sira hodi identifika área preokupasaun no buka opsaun kompromisu nian.

Prezidente mós bele sujere bainhira nasaun sira prontu atu hakat ba akordu kona-ba esbosu testu.

Alkansa akordu

Bainhira grupu informál sira hetan konsensu, esbosu testu ne'e enkamiña/manda ba órgaun subsidiáriu relevante ka plenária COP nian hodi hetan adosaun formál.

Karik seidak hetan akordu, Prezidente bele halibur grupu ki'ik ida hosi negosiadór sira, ne'ebé dalabarak hanaran "Friends of the Chair", atu ajuda hakotu impase sira no buka solusaun.

Bainhira konsensu hetan ona, desizaun final sira aprova oficialmente iha sesaun plenária.

Papél Sosiedade Sivíl no Ativista sira

Durante prosesu ida ne'e, sosiedade sivíl no ativista sira iha papel importante hanesan:

-  Monitoriza negosiasaun sira
-  Garante governu siraresponsavel ba sira-nia desizaun
-  Akompaña implementasaun akordu sira iha UNFCCC, inklui Akordu Paris ne'e implementa ona ho efetivamente

Asuntu Xave sira ne'ebé Diskute iha Negosiasaun Internasionál sira kona-ba Klimátika

Negosiasaun internasionál kona-ba klimátika foka liu ba oinsá sistema UNFCCC funsiona no oinsá nasaun sira koopera hodi hasoru mudansa klimátika. Konversasaun sira-ne'e mós kobre kestaun transversál sira ne'ebé influensia oinsá asaun klimátika globál bele sai ambisiozu no efetivu. Tuirmai ne'e tópiku prinsipál sira ne'ebé diskute iha negosiasaun sira:

Mitigasaun – Mitigasaun maka kona-ba hamenus emisaun gás sira ho efeitu estufa no aumenta solusaun naturál sira, hanesan ai-laran sira, ne'ebé absorve karbonu. Negosiasaun sira esplora oinsá nasaun sira bele hamenus emisaun sira no hametin karbonu sira hodi hamenus akesimentu globál.

Adaptasaun – Adaptasaun foka ba ajustamentu ba impaktu klimátiku sira. Nasaun sira diskute oinsá mudansa klimátika afeta ema no ekosistema sira, kustu sira adaptasaun nian, oinsá avalia vulnerabilidade, no oinsá asaun adaptasaun sira tenke hetan finansiamentu liuliu ba comunidade sira ne'ebé iha risku liu.

Lakon no estragu – Lakon no estragu refere ba impaktu klimátiku sira ne'ebé labele evita ka adapta, hanesan lakon permanente rai ka meu-subsisténsia sira. Maski laiha definisaun ofisiál ida de'it, negosiasaun sira aborda oinsá atu hatán ba impaktu sira-ne'e. Diskusaun sira dalabarak sensivel, liuliu kona-ba responsabilidade no kompensasaun ba nasaun sira ne'ebé afetadu tanba mudansa klimátika.

Finansiamentu – Diskusaun finansiamentu klimátika foka ba oinsá apoio osan fornese no oinsá monitoriza nia uza. Diskusaun importante ida maka sé nasaun mak tenke hetan prioridade ba apoio, liuliu nasaun sira ne'ebé vulnerável liu.

Transparénsia – Transparénsia importante atu harii konfiansa no responsabilidade. Negosiasaun sira define regra atu mede, relata, no verifika asaun klimátika. Laiha sistema transparénsia forte, difísil atu hatene progresu real ba kompromisu klimátika.

Dezenvolvimentu no Transferénsia Teknolojia – Nasaun sira servisu hamutuk atu dezenvolve no fahe teknolojia ne'ebé amigável ba klimátika, liuliu ba nasaun iha dezenvolvimentu. Diskusaun sira inklui kooperasaun téknika, inovasaun, no oinsá ultrapasa obstákulu hanesan kustu aas ka asesu limitadu ba teknolojia foun.

Asaun ba Empoderamentu Klimátiku (ACE) – ACE foka ba edukasaun, treinu, sensibilizasaun públika, no asesu ba informasaun. Objetivu ida ne'e maka empodera ema sira atu kompriende mudansa klimátika no partisipa iha asaun klimátika.

Jéneru – Nasaun sira rekoñese katak feto no mane sira esperiénsia mudansa klimátika ho maneira ne'ebé la hanesan. Negosiasaun sira promove polítika sira ne'ebé responde ba jéneru no akompaña progresu kona-ba ekilíbriu jéneru no partisipasaun inkluzivu iha foti desizaun kona-ba klima.

Povu Indíjena sira – Negosiasaun sira subliña importánsia hosi koñesimentu, prátika no lideransa Indíjena nian. Plataforma Komunidade Lokál no Povu Indíjena sira (LCIPP) apoia fahe esperiénsia no prátika di'ak liu kona-ba adaptaasaun no mitigasaun, hodi hametin partisipasaun Indíjena iha asaun klimátika.

Agrikultura – Diskusaun sira kona-ba agrikultura explora oinsá mudansa klimátika afeta seguransa ai-han no sistema agrikultura nian. Negosiasaun sira aborda vulnerabilidade sira iha agrikultura no promove abordajen sira ne'ebé reziliente ba klima liuhosi workshop sira, peskiza, no kolaborasaun ho órgaun sira UNFCCC nian.

Implementasaun Kooperativa – Nasaun sira bele voluntariamente serbisu hamutuk hodi hasa'e ambisaun iha implementasaun sira nia kompromisu sira kona-ba klima, inklui sira nia NDC sira. Abordajen kooperativa sira-ne'e, ne'ebé trasa iha Artigu 6 hosi Akordu Paris nian, apoia asaun klimátika konjunta liuhosi fronteira sira.

Hadi'ak-Kapasidade – Hadi'ak- kapasidade ajuda nasaun sira dezenvolve abilidade, instituisaun, no sistema sira ne'ebé presiza atu kumpre sira nia kompromisu sira kona-ba klimátika. Negosiasaun sira foka liu ba haforsa kapasidade nasional liuhosi kooperasaun no apoiu internasionál.

Siénsia – Ligasaun metin entre siénsia klimátika no polítika maka esensial. Negosiasaun sira depende ba peskiza sientífika, observasaun sira, no avaliasaun sira hodi orienta desizaun sira no aseguira katak polítika klimátika sira bazeia-ba evidénsia di'ak liu ne'ebé disponivel.

Oinsá Desizaun sira Adota Legalmente: Konsensu no Prosedimentu Regra

Tuir UNFCCC desizaun sira adota liuhosi konsensu, la'ós liuhosi votasaun. Konsensu signifika katak laiha nasaun ida mak objeta formalmente ba desizaun ida iha momentu ne'ebé desizaun ne'e adota. Ida-ne'e la signifika katak nasaun hotu-hotu satisfeitu tomak, maibé sira prontu atu simu rezultadu. Maski UNFCCC iha Esbosu Regra Prosedimentu nian, regra xave ida (Regra 42), ne'ebé sei permite votasaun nunka hetan akordu formál. Tanba ida-ne'e:



Votasaun la uza ba desizaun importante



Nasaun hotu iha lian hanesan, maski sira boot ka ki'ik



Negosiasaun depende loos ba kompromisu no diplomasia

Iha prátika, kuandu esbosu desizaun ida prontu ona, lori ba sesaun plenaria, Prezidente husu karik iha objesaun ruma. Se laiha ida maka levanta, desizaun ne'e sei rezolve no ofisialmente adota. Maski nasaun ida objeta, negosiasaun sira tenke kontinua.



Tipu Rezultadu Negosiasaun nian: Desizaun sira vs Konkluzan sira

Negosiasaun internasionál sira kona-ba klimátika prodús tipu oioin hosi rezultadu ofisiál sira, ida-idak ho papél ne'ebé distintu iha governasaun.

Desizaun sira

- ★ Adota hosi COP, CMA, ka CMP
- ★ Politikamente vinkulativu iha nivel internasionál
- ★ Estabelese regra sira, kompromisu sira, mandatu sira, no serbisu iha futuru
- ★ Gia polítika nasionál sira kona-ba klimátika, relatóriu, no implementasaun

Ezemplu sira inklui desizaun sira kona-ba:

- ★ Kuadru relatóriu nian
- ★ Aranju finansiamentu ba klimátika
- ★ Programa servisu foun

Konkluzan sira

- ★ Adota hosi Órgaun Subsidiáriu sira (SBI ka SBSTA)
- ★ Halo rezumu ba diskusaun tékniku sira no progresu
- ★ Dala barak rekomenda pasu sira tuirmai ka desizaun sira iha futuru
- ★ Labele kria rasik obrigasaun foun sira

Iha prátika, maioria kestaun sira la'o liuhosi dalan ida:

- 1 Diskusaun tékniku sira iha SBI ka SBSTA nia okos
- 2 Konkluzan sira ne'ebé adota hosi órgaun subsidiáriu sira
- 3 Rekomendasaun sira ne'ebé haruka ba COP ka CMA
- 4 Desizaun formál sira adota iha sesaun tuirmai

Ezemplu: Oinsá Desizaun Klimatika sira Afeta Ha'u nia Komunidade?

Ita-boot haree ona kuadru informasaun ba projetu ida iha ita-boot nia área hanesan infraestrutura estrada, protesaun ba inundasaun, ka projetu kuda ai-parapa? Ita-boot bele nota katak doador sira nia naran hanesan Fundu Klima Verde/*Green Climate Fund* (GCF) ou *Global Environmental Facility* GEF. Projetu ne'e implementa hosi ajénsia ka organizasaun sira.

Ida-ne'e maka ezemplu ida kona-ba oinsá negosiasaun internasionál sira kona-ba klima nakfilak ba asaun lokál. Desizaun sira ne'ebé halo iha enkontru globál sira kona-ba klima influensia finansiamentu ba projetu sira ne'ebé maka hetan apoiu, no oinsá solusaun sira kona-ba klima to'o ba comunidade sira.

Papél Prezidénsia COP no Gabinete COP

COP idak-idak lidera hosi Prezidente COP ida, normalmente ministru senior ida hosi nasaun uma-na'in. Prezidénsia COP hala'o papél lideransa sentrál, liuliu bainhira negosiasaun sai difisil.

Prezidente COP nian:

-  Prezide sesaun plenária sira
-  Orienta diresaun polítika jerál hosi negosiasaun sira
-  Hala'o konsultasaun bainhira konversa sira paradu
-  Nomeia fasilitadór sira no konvoka grupu ki'ik sira atu rezolve impase sira
-  Asegura prosesu ne'e inkluzivu, transparente, no ekilibradu

Importante, bainhira serbisu nu'udar Prezidente, indíviduu la halo negosiasaun hodi sira-nia nasaun-nia naran.

Gabinete COP

Prezidente COP hetan apoiu husi Gabinete COP, ne'ebé kompostu husi ofisiál eleitu sira ne'ebé representa rejiaun ONU hotu-hotu.

Gabinete:

-  Apoia desizaun prosedimentál sira
-  Garante ekilíbriu no justisa rejionál
-  Asiste Prezidente hodi jere prosesu

Eventu, Workshop no Diálogu Tékniku sira ne'ebé maka mandatu

Governasaun klimátika internasionál la akontese de'it liuhosi negosiasaun. Desizaun COP barak maka manda workshop, diálogu, no eventu tékniku sira hodi avansa komprensaun no harii konsensu.

Eventu mandatu sira-ne'e:

-  Husu formalmente hosi desizaun sira COP ka CMA nian
-  Halibur peritu sira, negosiador sira, no pratikante sira
-  Esplora kestaun kompleksu sira hanesan finansa, adaptasaun, ka transparénsia
-  Fó espasu ba aprendizajen, fahe esperiénsia sira, no hadi'ak-kapasidade

Rezultadu sira hosi eventu sira-ne'e hanesan relatóriu ka sumáriu sira dalabarak alimenta direktamente ba negosiasaun sira iha futuru no testu desizaun sira.

La'ós dokumentu ofisiál sira no Testu Informál sira

La'ós dokumentu hotu-hotu ne'ebé iha influénsia iha governasaun klimátika ne'e ofisiál. Durante negosiasaun sira, Prezidente ka Parte sira bele sirkula "la'ós-dokumentu ofisiál sira":

-  Testu esbosu informál sira
-  Laiha estatutu legál
-  Koko ideia sira ka propoin linguajen kompromisu

La'ós-Dokumentu Ofisiál (non-paper:

-  La hetan negosiasaun formál
-  Bele simu, ignora, ka rejeita
-  Dala barak sai hanesan baze ba esbosu ofisiál sira tuirmai

Liuliu bainhira negosiasaun sai intensu, *non-paper* sira bele influencia direksaun diskusaun no ajuda hamenus diferença polítiku.

Linguajen, Interpretasaun, no Asesibilidade

UNFCCC hala'o operasaun iha lian ofisiál neen hosi ONU. Maibé, asesu ba interpretasaun variedade tuir tipu enkontru.

- ★ **Sesaun plenária sira** → Fornese interpretasaun simultáneu
- ★ **Kontaktu grupu sira, grupu esbosu sira, no informál sira** → Hala'o iha Inglés de'it laiha interpretasaun

Ida-ne'e kria dezafiu sira ba delegadu sira hosi nasaun sira ne'ebé la ko'alia Inglés no bele afeta:

- ★ Kualidade partisipasaun
- ★ Konfiansa iha negosiasaun sira
- ★ Abilidade atu envolve iha diskusaun testu ne'ebé la'o lalais

Asaun Globál nu'udar Mekanizmu Governasaun nian

Tuir Akordu Paris nian, nasaun sira participa iha Asaun Globál, prosesu periódiku ida hodi avalia progresu globál koletivu.

Asaun Globál:

- ★ Halo revizaun ba mitigasaun, adaptasaun, no apoiu
- ★ Bazeia hosi evidénsia sientífica (inklui relatóriu sira IPCC nian)
- ★ Konsidera ekuidade no justisa
- ★ Informa kompromisu nasional sira iha futuro (NDCs)

Ida-ne'e la julga nasaun ida-idak, maibé avalia se asaun globál suficiente atu atinji objetivu klimátiku sira ba tempu naruk.

Asaun Globál sira hakarak atu akompaña karik mundu hamenus duni emisaun sira no proteje nasaun sira ne'ebé vulneravel. Ba Timor-Leste, ida-ne'e ajuda hatudu oinsá impaktu klimátiku sira hanesan inundasaun, rai-maran, no nivel tasi-been sa'e afeta hela nasaun ki'ik no vulneravel sira no tanba-ne'e presiza asaun no apoiu globál ne'ebé forte liu.

Dinámika Poder no Presaun Tempu iha Negosiasaun sira

Negosiasaun sira UNFCCC nian iha presaun maka'as ba tempu:



Enkontru barak hala'o iha paralelu



Delegadu sira dalabarak halo negosiasaun to'o kalan boot



Kompromisu finál sira dalabarak hetan iha oras 24-48 ikus

Nasaun sira ho delegasaun boot liu, perísia téknika barak liu no rekursu finanseiru boot liu bele tuir enkontru barak liu no tuir agenda barak liu. Delegasaun sira ne'ebé ki'ik liu depende maka'as ba grupu negosiasaun sira, koordinadór sira no estratéjia sira ne'ebé fahe.

Foin-Sa'e no Governasaun Klimátika Internasionál



Governasaun klimátika internasionál bele sente dook hosi moris loroloron nian iha Timor-Leste. Enkontru globál sira akontese iha rai-li'ur, diskusaun sira-ne'e tékniku, no ema uitoan de'it maka bele tuir. Maibé involvimentu foin-sa'e la hahú iha enkontru internasionál nia hahú iha uma laran.

1 Komprende Sistema Klimátiku Globál

Desizaun internasionál sira kona-ba klimátika halo liuliu tuir Konvensaun Kuadru Nasoins Unidas nian kona-ba Mudansa Klimátika (UNFCCC), ho negosiasaun boot sira ne'ebé akontese iha Konferénsia anuál hosi Parte sira (COP).
Maioria foin-sa'e sira iha Timor-Leste sei la tuir COP sira no ne'e la problema.

Foin-sa'e sira bele envolve nafatin liuhosi:

-  Aprende báziku kona-ba UNFCCC, COP, no Akordu Paris nian
-  Tuir rezultadu COP nian liuhosi sumáriu sira, mídia sosiál, ka informasaun ba foin-sa'e sira
-  Komprende kona-ba oinsá desizaun globál sira afeta planu, finansiamentu, no projetu nasional sira kona-ba klimátika iha Timor-Leste

2 Tama ka Kria Grupu Klima Foin-sa'e nian

Iha Timor-Leste, involvimentu foin-sa'e dalabarak akontese liuhosi:

-  Grupu estudante sira no klube universitáriu sira
-  ONG sira ka organizasaun komunitária sira ne'ebé lidera hosi foin-sa'e sira
-  Grupu foin-sa'e sira ne'ebé bazeia ba fiar ka comunidade
-  Rede foin-sa'e informál sira ne'ebé serbisu kona-ba ambiente, risku dezastre, ka dezvoltamentu

Liuhosi grupu sira-ne'e, foin-sa'e sira bele diskute asuntu klima globál iha linguajen no kontestu lokál, fahe esperiênsia comunidade nian (inundasaun, rai-maran, inseguransa ai-han) no dezenvolve mensajen hamutuk ka deklarasaun foin-sa'e nian.

3

Hatama Lian Lokál sira ba Prosesu Nasionál sira

Desizaun internasionál sira kona-ba klimátika to'o iha Timor-Leste liuhosi planu, polítika, no relatóriu nasionál sira. **Foin-sa'e sira bele envolve ho realistiku liuhosi:**

- ✧ Partisipa iha konsultasaun nasionál ka munisípiu ka atividade sensibilizasaun (bainhira disponivel)
- ✧ Fahe esperiênsia comunidade nian ho governu, ONG sira, ka parseria dezvoltamentu sira
- ✧ Kontribui perspetiva foin-sa'e sira nian liuhosi organizasaun sosiedade sivil sira ne'ebé envolve ho parseria internasionál sira

Maski foin-sa'e sira la iha aula/sala negosiasaun nian, sira-nia istória bele to'o nafatin iha espasu globál sira liuhosi kanál nasionál sira.

4

Liga Asaun Komunitade nian ba Kompromisu Globál sira

Projetu klimatika barak iha Timor-Leste hanesan redusaun risku inundasaun, apoiu agrikultura, restaurasaun ai-parapa, ka preparasaun ba dezastre iha ligasaun ho akordu no finansiamentu internasionál.

Foin-sa'e sira bele:

- ✧ Suporta ka voluntariu iha atividade klimátika no dezastre comunidade nian
- ✧ Ajuda hasa'e konxiênsia kona-ba tansá maka projetu sira-ne'e eziste
- ✧ Dokumenta impaktu no solusaun sira klimátika lokál nian

5

Uza Plataforma Sira Ne'ebé Amigavel Ba Foin-Sa'e Sira Hodi Ko'alia

Foin-sa'e sira iha Timor-Leste envolve beibeik liuhosi:

- ✧ Mídia sosiál no kampaña dijitál sira
- ✧ Diálogu sira ba foin-sa'e sira, workshop sira, no eventu públiku sira
- ✧ Atividade sensibilizasaun kona-ba klimátika iha eskola no comunidade sira

Hodi fahe istória lokál sira liuliu hafoin inundasaun, rai-maran, ka tempu estremu, foin-sa'e sira ajuda mundu atu komprende tanbasá maka asaun klimátika internasionál ne'ebé forte ne'e importante ba nasaun ki'ik no vulneravel sira.

6 Harii Abilidade ba Partisipasaun iha Futuru

La'ós foin-sa'e hotu-hotu ohin sei tama iha delegasaun internasionál maibé barak mak bele prepara ba aban-bainrua

Envolvimentu foin-sa'e nian ajuda harii:



Lideransa no abilidade komunikasaun nian



Komprensaun kona-ba polítika klimátika no justisa



Konfiansa atu envolve ho ema ne'ebé foti desizaun sira

Esperiénsia sira ne'e bele lori foin-sa'e ba oportunidade iha futuro, hanesan serbisu iha governu, ONG, ka espasu internasionál.

Fahe Experiência:



foin-sa'e sira ne'ebé involve iha LCOY Timor-Leste



Foin-sa'e sira ne'ebé fó apoiu ba asaun klimátika comunidade nian (eskola, Suku, igreja, CSO)



Foin-sa'e sira ne'ebé observa ka envolve iha konsultasaun nasionál sira (NDC, diálogo polítika)

Referéncia

- Democratic Republic of Timor-Leste. (2021). Timor-Leste's national adaptation plan: Addressing climate risks and building climate resilience. UNFCCC. <https://unfccc.int/sites/default/files/resource/NAP-Timor-Leste-2021.pdf>
- Global Environment Facility. (2024). GEF response to COP28 guidance from the UNFCCC. https://www.thegef.org/sites/default/files/documents/2024-11/GEF%20UNFCCC%20COP28%20Guidance_2024_11.pdf
- Government of Timor-Leste. (2020). Second national communication of Timor-Leste to the United Nations Framework Convention on Climate Change. UNFCCC. <https://unfccc.int/sites/default/files/resource/Second%20National%20Communication%20Timor-Leste.pdf>
- Government of Timor-Leste. (2022). National climate change policy (Government Resolution No. 8/2022 of March 1st). <https://www.laohamutuk.org/Env/Climate/2023/220301GovRes8NationalClimateChangePolicyEn.pdf>
- Government of Timor-Leste. (2022). Timor-Leste updated nationally determined contribution 2022–2030. UNFCCC. https://unfccc.int/sites/default/files/NDC/2022-11/Timor_Leste%20Updated%20NDC%202022_2030.pdf
- International Institute for Environment and Development. (n.d.). Climate governance and development: Taking stock and looking forward. <https://www.iied.org/sites/default/files/pdfs/migrate/G04455.pdf>
- UNDP. (2022). What is climate governance? Volume III. United Nations Development Programme. <https://www.undp.org/sites/g/files/zskgke326/files/2022-09/Volume%20III%20What%20is%20climate%20governance.pdf>
- UNFCCC. (n.d.). Governance structure and components. United Nations Framework Convention on Climate Change. <https://unfccc.int/topics/global-stocktake/about-the-global-stocktake/governance-structure-and-components>
- UNFCCC. (n.d.). The intergovernmental and legal process. United Nations Framework Convention on Climate Change. <https://unfccc.int/resource/process/guideprocess-p.pdf>
- UNFCCC. (2006). United Nations Framework Convention on Climate Change: Handbook. Climate Change Secretariat. <https://unfccc.int/resource/docs/publications/handbook.pdf>
- UNICEF. (n.d.). What is climate governance? United Nations Children's Fund. <https://www.unicef.org/lac/en/media/19651/file/what-is-climate-governance.pdf>

Publikadu hosi UNICEF Timor-Leste
Iha parseria ho Governu Timor-Leste
Dili

timorleste@unicef.org
www.unicef.org/timorleste/

©United Nations Children's Fund (UNICEF), Juñu 2026

unicef 
for every child